

唐人說薈

濟蒼題籤



唐人說本

卷之四

韓重

吳王夫差小女曰玉年十八。童子韓重年十九。玉悅之。私交信問。許之為妻。重學於齊魯之間。屬其父母使求婚。王怒不與。玉結氣死。葬閭門外。三年重往問其父母。父母曰。王大怒。玉結氣死已葬矣。重哭泣哀慟。具牲幣往弔。玉從墓側形見。謂重曰。昔爾行之後。令二親從王相求。度必克從。大願不圖。別後遭命奈何。玉左顧宛頸而歌曰。南山有鳥。北山張羅。志欲從君。讒言孔多。悲結生疾。沒命黃壚。命之不造。寃如之何。羽族之長。名為鳳凰。一日失雄。三年感傷。雖有衆鳥。不為匹雙。故見鄙姿。逢君輝光。身遠心近。何當暫忘。歌畢。歔歔涕流。不能自勝。要重還冢。重曰。死生異道。懼有尤愆。不敢承命。玉曰。死生異路。吾亦知之。然今一別。永無後期。子將畏我為鬼而禍乎。誠欲所奉。寧不相信。重感其言。送之還冢。玉與之飲讌。三日三夜。盡夫婦之禮。臨出。取徑寸明珠以送。重曰。既毀其名。又絕其願。復何言哉。時節自愛。若至吾家。致敬大王。重既出。遂詣王。自說其事。王大怒曰。吾女既死。而重造訛言。以玷穢亡靈。此不過發冢取物。託以鬼神。趨收重。重脫走至玉墓所訴。玉曰。無憂。今歸白玉。玉粧梳。

忽見王驚愕悲喜問曰爾何緣生玉跪而言曰昔諸生韓重來求玉大王不喜玉名毀義絕自致身亡重從遠還聞玉已死故賣牲幣詣家吊唁感其篤終輒與相見因以珠遺之不為發家願勿推治夫人聞之出而抱之玉如烟然

劉導

劉導字仁成沛國人梁貞簡先生璵三從姪父璵梁左衛卒導好學篤志專勤經籍慕晉關康曾隱京口與同志李士烟同宴于時春江初霽共歎金陵皆傷興廢俄聞松下有數女子笑聲乃見一青衣女童立導之前曰館娃宮歸路經此聞君志道高聞欲冀少留願垂顧盼語訖二女至容質甚異皆如仙者衣紅紫絹縠馨香襲人俱年二十餘導與士烟不覺起拜謂曰人間下俗何降神仙二女相視而笑曰佳爾輕言願從容以陳幽抱導揖就席謂曰塵濁酒不可以進二女笑曰既來叙會敢不同觴衣紅絹者西施也謂導曰適自廣陵渡江而至殆不能堪深願思飲衣素絹夷光也謂導曰同官三姝久曠深幽與妾此行蓋為君子導謂夷光曰夫人之姊固為導匹乃指士烟曰此夫人之偶也夷光大笑而熟視之西施曰李郎風儀亦足開暢夷光曰阿婦夫容貌豈得動人合座喧笑俱起就寢臨曉請去尚未天明西施謂導曰妾本浣沙之女吳王之姬君固知之矣為越所遷妾落他人之手矣王沒後復位故

國今吳王以耄不任妾等夷光是越王之姬越昔貢吳王者妾與夷光相愛坐則同席出則同車今者之行實因緣會言訖惘然導與士烟深感恨之間京口曉鐘各執手曰後會無期西施以寶鈿一隻留與導夷光亦折裾珠一隻以贈士烟言訖共乘寶車去如風雨音猶在耳頃刻無跡時梁武帝天監十一年七月也

崔羅什

長白山西有夫人墓魏孝昭之世搜揚天下才俊清河崔羅什弱冠有令望被徵詣州夜經於此忽見朱門粉壁樓臺相望俄有一青衣出語什曰女郎須見崔郎什愕然下馬入兩重門內有一青衣通問引前什曰行李之中忽蒙厚命素既不敘無宜深入青衣曰女郎平陵劉府君之妻侍中吳質之女府君先行故欲相見什遂前入就床坐其女在戶東立與什敘溫涼室內二婢秉燭女呼一婢令以玉夾膝置什前什素有才藻頗善諷詠雖疑其非人亦愜心好也女曰比見崔郎息駕庭樹喜君吟嘯故求一敘玉顏什遂問曰魏帝與尊公書稱尊公為元城令然否也女曰家君元城之曰妾生之歲什仍與論漢魏時事悉與魏史符合言多不能備載什曰貴夫劉氏願告其名女曰狂夫劉孔才之第二子名瑤字仲璋比有罪被攝乃去不返什下牀辭出女曰從此十年當更相奉什遂以玳瑁留之女以指上玉環贈什什上馬行

數十步回顧乃見一大冢。什留厯下以為不祥。遂請僧為齋。以環布施。天統末什為王事所牽。築河隄於桓家冢。遂於幕下語斯事於濟南奚叔布。因下位曰。今歲乃是十年可如何也。作罷。什在園中食杏。唯云報女郎信。我即去。食一杏未盡而卒。什二為郡功曹。為州里推重。及死無不傷歎。

李陶

天寶中隴西李陶寓居新鄭。常寢其室。睡中有人搖之。陶驚起。見一婢袍袴容色甚美。陶問那忽得至此。婢云。鄭女郎欲相詣。頃之異香芬馥。有美女從西北甌壁中出。至床所再拜。陶知是鬼。初不交語。婦人慙忤却退。婢慢罵數四云。田舍郎待人故如是耶。令我女郎媿耻無量。陶悅其美色。亦心訝之。因結云。女郎何在。吾本未見。可更呼之。婢去又來云。女郎重君舊緣。且將復至。勿復如初。可以慙懃待之也。及至陶下床致敬。延之偶坐。須臾相近。女郎貌既絕代。陶深悅之。留連十餘日。陶母躬自窺覘。累使左右呼之。陶惡阻己志。亦終不出。婦云。大家召君。何以不往。得無坐罪於我。陶乃詣母。母流涕謂曰。汝承人昭穆。乃有鬼婦乎。陶言其故。自爾留連半載。不去。其後陶參選之上都。留婦在房。陶後遇疾篤。鬼婦在房謂其婢云。李郎今疾急。為之奈何。當相與往省問。至潼關為鬼關司所遏。不得過。會陶堂兄亦赴選入關。鬼婦得隨。

過其夕至陶所相見忻悅陶問何得至此云知卿疾甚故此相視素所持藥因和以飲陶陶疾尋愈其年選得臨津尉與婦同衆至舍數日當之官鬼辭不行問其故云相與緣盡不得復去言別悽愴自此遂絕

王元之

高密王元之少美丰儀為蘄春丞秩滿歸鄉里家在郭西嘗日晚徙倚門外見一婦人從西來將入郭姿色殊絕可喜年十八九明日出門又見之如此數四日暮輒來王戲問之曰家在何處暮暮來此女笑曰兒家近南岡有事須至郭王試挑之女遂欣然因留宿甚相親昵明旦辭去數夜輒一來後乃夜夜來宿王情愛甚至試謂曰家既近相許過否答曰家甚狹陋不堪延客且與亡兄遺女同居不能無嫌疑耳王遂信之寵念轉密於女工特妙王之衣服皆女裁製見者莫不歎賞之左右一婢亦有姜色常隨其後雖晝日亦不復去王問曰兄女得無相望乎答曰何須強預他家事如此積一年後一夜忽來色甚不悅啼泣而已王問之曰過蒙愛接方復離異奈何因嗚咽不能止王驚問故女曰得無相難乎兒本前高密令女嫁為任氏妻任無行見薄父母憐念呼令歸後乃遇疾卒殯於此今家迎喪明日當去王既愛念不復嫌忌便復悲惋問明日將至何時曰日暮耳一夜敘別不眠明日臨別女以金鏤玉

孟及玉環一雙留贈。王以繡衣一箱答之。各握手揮涕而別。明日至期。王于南岡視之。果有家人迎喪發櫬。女顏色不變。粉黛如故。見繡衣一箱在棺中。而失其所送金盃及玉環。家人方覺有異。王乃前具陳之。兼示之。王孟與環皆捧之悲泣。因問曰。兒女是誰。曰。家中小郎女。十歲病死。亦殯其旁。婢亦帳中木人也。其貌正與從者相似。王乃臨柩悲泣而別。左右皆感傷。後念之切。遂恍惚成疾。數日方愈。然每思輒忘寢食也。

鄭德楙

滎陽鄭德楙常獨乘馬。逢一婢姿色甚美。馬前拜云。崔夫人奉迎鄭郎。鄭愕然曰。素不識崔夫人。我未有婚。何故相迎。婢曰。夫人小女頗有容質。且以清門令族。宜相匹敵。鄭知非人。欲拒之。即有黃衣蒼頭十餘人至。曰。夫人趣郎進。輒控馬。其行甚疾。耳唯聞有風鳴。奄至一處。崇垣高門。外皆列植楸桐。鄭立於門外。婢先入。須臾命引鄭郎入。進歷數門。館宇甚盛。夫人着素羅裙。可年四十許。姿容可愛。立于東階下。侍婢八九皆鮮整。鄭趨謁再拜。夫人曰。無恠相屈。以鄭郎清族美才。願託姻好。小女無堪。幸能垂意。鄭見逼。不知所對。但唯唯而已。夫人乃上堂。命引鄭郎自西階升堂上。悉以花蜀薦地。左右施局脚床。七寶屏風。黃金屈膝。門垂碧箔。銀鈎珠絡。長筵列饌。皆極

豐潔乃命坐。夫人善清談。敘置輕重。世難與比。食畢命酒。以銀樽貯之。可三斗餘。琥珀色。酌以金鏤盃。侍婢行酒。味極甘香。向暮。一婢前白。女郎已嚴粧訖。乃命引鄭郎。即出就外間。浴以香湯。左右進衣冠履襪。并美婢十人扶入。恣為調謔。自堂及門。步致花燭。乃延就帳。女年十四五。姿色甚艷。目所未睹。被服燦麗。冠絕當時。鄭遂忻然。其夜成禮。明日夫人命女與就東堂。堂中置紅羅綉帳。衾幃褥席。悉皆精絕。女善彈箏篋。曲詞新異。鄭問所迎婚。前乘馬來。今在何處。曰。已今返矣。如此百餘日。鄭雖情愛頗重。而心稍嫌忌。因謂女曰。可得同歸乎。女慘然曰。幸托契會。得事巾櫛。然幽冥理隔。不遂如何。因涕泣交下。鄭審其怪異。乃白夫人曰。家中相失。頗有疑怪。乞賜還也。夫人曰。過蒙見顧。良深感慕。然幽冥殊途。理當雙隔。分離之際。能不泣然。鄭亦泣下。乃大譙會與別。曰。後三年當相迎也。鄭因拜辭。婦出門。揮淚握手曰。雖有後期。尚延年歲。歡會尚淺。乖離苦長。努力自愛。鄭亦悲惋。婦以襯體紅衫。及金釵一雙贈別。曰。若未相忘。以此為念。乃別而去。夫人救送鄭郎。乃前青驄也。被帶甚精。鄭乘馬出門。倏忽復至其家。奴遽云。家中已失一年矣。視其所贈。皆真物也。家人語云。郎君出後。其馬自歸。不見有人送來。鄭始尋其故處。惟見大墳旁有小冢。塋前列樹。皆已枯矣。而前所見悉華茂。成陰。其左右人傳此崔夫人及女郎墓也。鄭尤異之。自度三年。

之期必當死矣。後至期果見前所至使婢乘車來迎。鄭曰生死固有定命。苟得樂處。吾復何憂。乃悉分判家事。預為終期。明日乃卒。

柳參軍

華州柳參軍。名族之子。寡慈。早孤。無兄弟。罷官于長安。閒遊上巳日於曲江。見一車子。飾以金碧。從以青衣。殊亦俊雅。已而翠簾徐舉。見搵手如玉。指畫青衣。令摘芙蓉。女容色絕代。斜睨柳生良久。生鞭馬從之。即見車入永崇里。柳生知其大姓。崔氏女。亦有母。有青衣。字輕紅。柳生不甚貧。多方賂輕紅。竟不之受。他日崔氏女病。其舅執金吾王因候其妹。且告曰。請為子納焉。崔氏不樂。其母不敢違兄之命。諾之。女曰。願嫁得曲江所見柳生足矣。必不允。以某與外兄終恐不生余。其母念女深。乃命輕紅於薦福寺僧道省院。達意。柳生生悅。輕紅而挑之。輕紅大怒曰。君正性麤。奈何。小娘子如此待君子。某一微賤。便忘前好。欲保歲寒。其可得乎。某且以足下事白小娘子。柳生再拜謝不敏。始曰。夫人惜小娘子情切。今小娘子不樂適王家。夫人是以偷成婚約。君可兩三日就禮事。柳生極喜。備數千百財禮。期日結婚。後五日柳挈妻與輕紅于金城里居。及旬月。金吾到永崇。其母王氏泣曰。吾夫亡。子女孤露。被姪不待禮會。強竊女去矣。兄豈無教訓之道。金吾大怒。歸答其子數十。密令捕訪。彌年無獲。亡何

王氏殂。柳生挈妻與輕紅自金城里赴喪。金吾之子既見，遂告父。父擒柳生，生云某于外姑王氏處納采，取妻非越禮私誘也。家人大小皆熟知之。王氏既沒，無所明，遂訟于官。公斷王家先下財禮，合歸于王。金吾子常悅表妹，亦不怨前事。經數年輕紅竟潔已處焉。金吾又亡，移其宅於崇義里。崔氏不樂事外兄，乃使輕紅訪柳生所在。時柳生尚居金城里。崔氏又使輕紅與柳生為期，兼資看圖。堅令積糞堆與宅垣齊。崔氏女遂與輕紅躡之，同詣柳生。柳生驚喜，又不出城，只遷羣賢里。後本夫終，尋崔氏女知羣賢里，住復興，訟奪之。王生情深崔氏，萬途求免，託以體孕，又不責而納焉。柳生長流江陵二年。崔氏與輕紅相繼殂。王生送喪，哀慟之禮至矣。輕紅亦葬于崔氏墳側。柳生江陵閒居，春二月繁花滿庭，追念崔氏，凝想形影，且不知存亡。忽聞叩門甚急，俄見輕紅抱粧奩而進。乃曰：小娘子且至。聞似車馬之聲，比崔氏入門，更無他見。柳生與崔氏敘契闊，悲歡之甚。問其由，則曰：某已與王生訣，自此可以同穴矣。人生意專，必果夙願。因言曰：某少習樂箏篴，頗有功。柳生即時置箏篴，調弄絕妙。二年間可謂盡平生矣。亡何王生舊使蒼頭過柳生門，忽見輕紅，不知其所以。又疑人有相似者，未敢遽言。問閭里，又言是流人柳參軍。彌怪更伺之。輕紅亦知是王生家人，因具言于柳生。生匿之。蒼頭却還城，具言于王生。生聞之，命駕千里而來。既至，柳

生門於隙窺之。正見柳生坦腹于臨軒榻上。崔女新粧。輕紅捧鏡於側。崔氏勾鉛黃未竟。王生門外極叫輕紅。鏡墜地有聲如磬。崔氏與王生無憾。遂入。柳生驚。亦待如賓禮。俄又失崔氏所在。柳生與王生具言其事。二人相看不喻。大異之。相與造長安。發崔氏葬處驗之。即江陵所施鉛黃。如新衣服。肌肉且無損敗。輕紅亦然。柳與王相誓却葬之。二人入終南訪道。遂不返。

崔書生

博陵崔書生。住長安永樂里。先有舊業在渭南。貞元中。嘗因清明節歸渭南。行至昭應北墟隴之間。日已晚。歇馬于古道左。比百餘步。見一女人靚粧華服。穿越榛莽。似失路于松栢間。崔閑步漸近。乃以袖掩面。而足趾跌蹶。屢欲仆地。崔使小童逼而覘之。乃二八絕代之姝也。遂令小童詰之曰。日暮何無儔侶。而悽惶於墟間耶。默不對。又令一童將所乘馬逐之。更以僕馬奉送。美人迴顧。意似微納。崔乃僂而緩逐之。以觀其近遠耳。美人上馬。一僕控之而前。纔數百步。忽見女奴三數人。多口望息。踉蹌而謂女郎曰。何處來。數處求之不得。擁馬行十餘步。則長年青衣駐立以俟。崔漸近。乃拜謝崔曰。郎君憇小娘子失路。脫驂僕以濟之。今日色已暮。邀郎君至庄可乎。崔曰。小娘子何忽獨步悽惶如此。青衣曰。因被酒興酣至此。取北行一二里。復到一樹。

林室屋甚嚴。桃李甚芳。又有青衣七八人迎女郎而入。少頃一青衣出傳主母命曰。小外甥因被醉。逃席失路。頗遇君子。卹以僕馬。不然日暮。或值惡狼狐媚。何所不加。闔室感佩。且慙。即當奉邀。青衣數人更出候問。如親戚之密。頃之邀崔入宅。既見。乃命具酒。酒至。從容敘言。某王氏外甥女。麗艷精巧。人間無雙。欲侍君子巾櫛。何如。崔邁逸者。因酒拜謝於坐側。俄命外甥出實神仙也。一住三日。譙游歡洽。無不耐暢。王氏稱其姨曰。玉姨。玉姨好與崔賭。玉愛崔口脂。合子。玉姨輸則有玉環相酬。崔輸且多。先於長安買得合子六七枚。都輸玉姨。崔亦贏玉指環二枚。忽一日。一家大驚曰。有賊至。其妻推崔生於後門外。纔出。妻已不見。但身卧於一穴中。惟見堯花半落。松風晚清。黃萼紫英。草露沾衣而已。其羸玉指環猶在帶上。却省初見美人之路而行。見童僕以鍬鍤發掘一墓穴。已至闌中。見銘記曰。後周趙王女玉姨之墓。平生憐重。王氏外甥。外甥先歿。後令與外甥同葬。棺柩儼然。開櫬中各有一合。合內有玉環六枚。崔比其賭者。畧無異矣。又一合中有口脂。合子數枚。乃崔生輸者也。崔生問僕人云。但見郎君入栢林。尋覓不得。方尋掘此穴。果不誤也。玉姨呼崔生奴僕為賊耳。生感之。即為掩葬。仍舊云。

鄭紹

商人鄭紹者喪妻後方欲再娶行經華陰止于逆旅因悅華山之秀峭乃自店南行可數里忽見青衣謂紹曰有人令傳意欲暫邀君紹曰何人也青衣曰南宅皇甫尚書女也適于宅內登臺望見君遂令致意紹曰女未適人耶何以止於此青衣曰女郎方自往求壻故止此紹詣之俄及一大宅又有侍婢數人出命紹入延之於館舍遂巡有女子出容質殊麗年可初笄從婢十餘並衣錦繡既相見即謂紹曰既遂披覲當去形迹冀稍從容紹唯唯隨之復入一門見珠箔銀屏煥爛相照閨闈之內塊然無侶紹乃問女是何皇尚書家何得孤居如是耶尊親焉在嘉偶為誰雖荷寵招幸祛疑抱女曰妾是故皇公之幼女也少喪二親厭居城郭故止于此方求自適不意良人惠然辱顧既愜所願何樂如之女乃命紹升榻坐定具酒餚出妓樂不覺向夕女引一金罍獻紹曰妾求佳壻已三年矣今既遇君子寧無自得妾雖慙不稱敢以金罍合卺願求奉箕帚可乎紹曰予一商耳多游南北惟利是求豈敢與簪纓家為戚屬乎然遭逢顧遇謹以為榮但恐異日為門下之辱女乃再獻金罍自彈箏以送之紹聞曲音淒楚感動于心乃飲之交獻誓為伉儷女笑而起時已夜久左右侍婢以紅燭前導成禮至曙女復于前閣備芳醪美饌與紹懽醉經月餘紹曰我當暫出以緝理南北貨財女泣曰鴛鴦匹對未聞經月離也紹不忍又經月餘紹復言曰我

商人也。泛江湖，涉道途，蓋是常分。雖深誠見挽，若久不出行，亦吾心所不樂。願勿以此為嫌。當如期而至。女以紹言，坵方許之。遂于家園張祖席以送。紹乃橐貨就路。至明年春，紹復至此，但見紅花翠竹，流水青山，杳無人迹。紹乃號慟，經日而返。

顏濬

會昌中，進士顏濬下第，游廣陵，遂之建業，賃小舟，抵白沙，同載有青衣。年二十許，服飾古樸，言詞清麗。濬揖之，問其姓氏，對曰：「幼芳姓趙，問其所適。」曰：「亦之建業。」濬甚喜。每維舟，即買酒果與之宴飲，多說陳隋間事。濬頗異之，或諧謔，即正色歛衽，不對。抵白沙，各遷舟。航青衣乃謝濬曰：「數日承君深顧，某陋拙不足奉歡笑，然亦有一事，可以奉酢。」中元必游瓦官閣，此時當為君會一神仙中人，况君風儀才調，亦甚相稱，望不渝此約。至時某候于彼，言訖各登舟而去。濬誌其言。中元日，來游瓦官閣，士女闐咽，及登閣，果有美人從二女僕，皆雙鬟而有媚態。美人倚欄獨語，悲歎久之。濬注視，不易。美人亦訝之，又曰：「幼芳之言，不謬矣。」使雙鬟傳語曰：「西廊有惠覽閣梨院，則某舊門徒，君可至是。」幼芳亦在彼。濬喜甚，攝其蹤而去。果見同舟青衣出而微笑。濬逆與美人敘寒暄，言語竟日。僧進茶果，至暮謂濬曰：「今日偶此登覽，為惜高閣病，茲不怠用功，不久設除。」故來一別。幸接歡笑，某家在清溪，頗多松月，室無他人。今夕必相

過某前往可與幼芳後來濬然之遂乘軒而去及夜幼芳引濬前行可數里而至有
青衣數輩秉燭迎之遂延入內室與幼芳環坐曰孔家娘子相隣使邀之曰今夕偶
有佳賓相訪願因傾觴以解煩憤少頃而至遂延入亦多說陳朝故事濬因起白曰
不審夫人復何姓第頗貯疑訝答曰某即陳朝張貴妃彼即孔貴嬪居世之時謬當
後主采顧寵幸之禮有過嬪妃不幸國亡為楊廣所殺然此賊不仁何甚乎劉禪孫
皓豈無嬪御獨有斯人行此冤暴且一種亡國我後主實即風流詩酒追歡琴樽取
樂而已不似楊廣西築長城東征遼海使天下男冤女曠父寡子孤途窮廣陵死于
匹夫之手亦上天降鑑為我報讎耳孔貴嬪曰莫出此言在座有人不欲聞美人大
笑曰渾忘却濬曰何人欲不聞斯言耶幼芳曰我本江令公家嬖者後為貴妃侍免
國亡之後為隋宮御女煬帝江都為侍湯膳者又兵亂入某以身蔽帝遂為所害蕭
后憐某盡忠於主因使殉瘞後改瘞于雷塘側不得從焉時至此謁貴妃耳孔貴嬪
曰前說盡是閑事不如命酒畧延曩日之歡耳遂命雙鬟持樂器洽飲久之貴妃題
詩一章曰秋草荒臺響夜蛩白楊聲盡滅悲風綵牋曾擘欺江惣綺閣塵清玉樹空
孔貴嬪曰寶閣排雲遠望仙五雲高艷擁朝天清溪猶有當時月夜照瓊花綻綺筵
幼芳曰皓魄初圓恨翠娥繁華濃艷竟如何兩朝惟有長江水依舊行人逝作波濬

亦和曰。蕭管清吟怨麗華。秋江寒月綺窓斜。慙非後主題詩客。得見臨春閣上花。俄聞叩門曰。江修容何姁姁。袁昭儀來謁貴妃。曰竊聞今夕佳賓幽會。不免輒窺盛筵。俱艷其衣裾。明其璫珮而入坐。及見四篇。捧而泣曰。今夕不意再逢三閣之會。又與新狎客題詩也。頃之間鷄鳴。孔貴嬪等俱起。各辭去。濬與貴妃就寢。欲曙而起。貴妃贈辟塵犀簪一枚。曰異日覩物思人。昨宵值客多。未盡歡情。別日更當一小會。然須諮祈幽府。嗚咽而別。濬翌日憤然若有所失。信宿更尋曩日地。則近清溪松檜邱墟。詢之於人。乃陳朝宮人墓。濬慘惻而返。數月閣因寺廢而毀。後至廣陵訪得吳公墓。煬帝舊陵。果有宮人趙幼芳墓。因以酒奠之。

勝兒

吳太伯祠在蘇閭門之西。每春秋季。市肆相率合牢醴祈福于三讓王。多圖善馬綵輿。子女以獻之。時乙丑春。有金銀行首糾合其徒。以輕綃畫美人侍婢。捧胡琴以從。其貌出於舊繪者。名美人為勝兒。蓋戶牖牆壁間前後所獻者。無以匹也。女平方舞。有進士劉景復送客之金陵。置酒于廟之東通波館。忽欠伸思寢。乃就榻。夢見紫衣冠者言曰。讓王奉屈。劉生隨至廟。周旋揖讓而坐。王語劉生曰。適納一胡琴妓。藝甚精而色殊麗。知吾子善歌。故奉邀作胡琴一章。以寵其藝。初生頗不甘。命酌人問酒。